

# Rehabeam Königen. C. XV. CXCVII.

2. par. 12. **WAS** aber mehr von Rehabeam zusagen ist / vnd alles was er gethan hat / **Sihe** / das ist geschrieben in der Chronica der Könige Juda. Es war aber Krieg zwischen Rehabeam vnd Jerobeam jr leben lang. Vnd Rehabeam entschliess mit seinen Vetern / vnd ward begraben mit seinen Vetern in der stad Daud / Vnd seine mutter hies Naema ein Ammonitin / Vnd sein son Abiam ward König an seine stat.

## XV.

**I**n achzehenden jar des Königs Jerobeam das sons Nebat / ward **Abiam** König in Juda / vnd regierte drey jar zu Jerusalem. Seine mutter hies Maecha eine tochter Abisalom. Vnd er wandelt in allen sünden seines Vaters / die er vor jm gethan hatte / vnd sein Hertz war nicht rechtschaffen an dem **HERREN** seinem Gott / wie das hertz seines vaters Dauds. Denn vmb Dauds willen / gab der **HERRE** sein Gott jm ein Liecht zu Jerusalem / das er seinen Son nach jm erwecket vnd erhielt zu Jerusalem / darumb / das Daud gethan hatte das dem **HERREN** wolgefiel / vnd nicht gewichen war / von allem das er jm gebot / sein ledenlang / On in dem handel mit Oria dem Hethiter. Es war aber ein Krieg zwischen Rehabeam vnd Jerobeam sein lebenlang.

**WAS** aber mehr von Abiam zu sagen ist / vnd alles was er gethan hat / **Sihe** / das ist geschrieben in der Chronica der Könige Juda. Es war aber Krieg zwischen Abiam vnd Jerobeam. Vnd Abiam entschliess mit seinen Vetern / vnd sie begruben in in der stad Daud / Vnd Assa sein son ward König an seine stat.

4. par. 13. **I**n zwenzigsten jar des Königs Jerobeam ober Israel / ward **Assa** König in Juda / vnd regiert ein vnd vierzig jar zu Jerusalem. Seine mutter hies Maecha eine tochter Abisalom. Vnd Assa thet das dem **HERREN** wolgefiel / wie sein vater Daud / Vnd thet die Hurer aus dem Lande / vnd thet ab alle Götzen / die seine Vetter gemacht hatten. Dazu setzt er auch seine mutter Maecha ab / vom Ampt / das sie dem Miplezeth gemacht hatte im Hayne / vnd Assa rottet aus jren Miplezeth / vnd verbrands im bach Kidron. Aber die Höhen theten sie nicht abe / Doch war das hertz Assa rechtschaffen an dem **HERREN** / sein leben lang. Vnd das silber vnd gold vnd gefess das sein vater geheiligt hatte / vnd was geheiligt war zum Hause des **HERREN** / bracht er ein. Vnd es war streit zwischen Assa vnd Baesa dem Könige Israel jr leben lang.

**Assa**

41. jar König in Juda.

(Miplezeth)  
Wer der Miplezeth gewesen sey / ist vngewis. Etliche sagen / es sey der Abgott priapus gewesen.

2. par. 14. **B**aesa aber der König Israel zoch er auff wider Juda / vnd bauet Rama / das niemand solt aus vnd einziehen auff Assa seiten des Königs Juda. Da nam Assa alles silber vnd gold das vbrig war im schatz des Haus des **HERREN** / vnd im schatz des haus des Königes / vnd gabs in seiner Knechte hende / vnd sand sie zu Benhadad dem son Tabrimon / des sons Hesion / dem Könige in Syrien / der zu Damasco wonet / vnd lies jm sagen. Es ist ein Bund zwischen mir vnd dir / vnd zwischen meinem Vater vnd deinem vater / Drum schicke ich dir ein Geschenke / silber vnd gold / das du fahren lassst den Bund / den du mit Baesa dem Könige Israel hast / das er von mir abziehe.

**Baesa**.

**Benhadad**.

**Benhadad** gehorchet dem Könige Assa / vnd sandte seine Heubtleute wider die stedte Israel / vnd schlug Jion vnd Dan vnd Abel Beth Maecha / das ganz Cineroth / an dem gangen lande Naphthali. Da das Baesa höret / lies er ab zu bauen Rama / vnd zoch wider gen Thirza. Der König Assa aber lies erschallen im gangen Juda / Hie sol niemand vngestraft bleiben. Vnd ste rament die stein vnd holtz von Rama weg / da mit Baesa gebawet hatte / Vnd der König Assa bauete da mit Geba Ben Jamin vnd Mizpa.

**WAS**